

आकाशवाणी

खबरां

1. सुप्रीम कोर्ट नै कलकत्ता हाई कोर्ट गी एस.आई.आर तेहत दावें ते ऐतराजें दे नबेड़े लेई झारखंड ते ओडिशा थमां न्यायिक अधिकारी सहने दी इजाजत दित्ती ऐ।
2. मुख चुनांS आयुक्त ज्ञानेश कुमार होरें मुखे च त्रुटिरैहत मतदाता सूचिएं पर जोर दिंदे होई इनेंगी मजबूत लोकतंत्र दी बुनियाद करार दित्ता ऐ।
3. उपराष्ट्रपति सी.पी राधाकृष्णन होरें अज्ज नमीं दिल्ली च भारत अमरीका सैलसफा नेतृत्व शिखर सम्मेलन दा उद्घाटन कीता।
4. भारती स्टेट बैंक आसेआ जारी इक रपोट मुजब चालू माली बरे दी त्रीS तिमाही च देश दी अर्थ बवस्था च 8 इशारिया 1 प्रतिशत दा बाह्वा दर्ज कीता गेआ ऐ।
5. आई.सी.सी टी-20 विश्व दे सुपर एट मकाबले च पाकिस्तान ते इंग्लैंड बश्कार मकाबला जारी ऐ।

<><><><><><>

Supreme Court SIR

सुप्रीम कोर्ट नै कलकत्ता हाई कोर्ट दे चीफ जस्टिस गी पच्छिम बंगाल च मतदाता सूचिएं दी नमें सिरेआ व्यापक नजरसानी एस.आई.आर. दे तैहत 80 लख दावें ते ऐतराजें कन्नै निब्वडने लेई सिविल जजें दी तैनाती ते गोआंडी राज्यें झारखंड ते ओडिशा थमां न्यायिक अधिकारिएं गी सहने दी इजाजत देई दित्ती ऐ। मुख न्याधीश जस्टिस सूर्यकांत हुंदी अध्यक्षता आहली पीठे कोलकाता हाई कोर्ट दे चीफ जस्टिस हुंदी चिट्ठी पर गौर कीता ऐ जेहदे च आखेआ गेदा हा जे 250 जिला जजें गी इस प्रक्रिया गी पूरा करने च घट्टोघट्ट 80 दिन लग्गडन।

<><><><><><>

CEC-Electral Polls

मुख चुनांS आयुक्त ज्ञानेश कुमार होरें मुखे च त्रुटिरैहत मतदाता सूचिएं पर जोर दिंदे होई आखेआ ऐ कि एह कुसै बी लोकतांत्रिक राष्ट्र दी बुनियाद ऐ। अज्ज नमीं दिल्ली दे भारत मंडपम च निर्वाचन आयोग ते राज्य चुनांS आयुक्तें दे राष्ट्री गोलमेज सम्मेलन गी संबोधत करदे होई उनें आखेआ कि सभनें योग्य मतदाताएं गी मतदाता सूचि च शामिल करने ते अयोग्यें गी बाहर रखने लेई एस.आई.आर दी प्रक्रिया शुरू कीती गई ऐ।

<><><><><><>

PM-Isreal Visit

प्रधानमंत्री नरेंद्र मोदी होर कल दो दिनें दी सरकारी जातरा पर इजराइल जा करदे ना। इस दरान मोदी होरें इजराइल दे प्रधानमंत्री बेंजामिन नेतन्याहू हुंदे नै मुलाकात करंगन। दवें नेता भारत-इजराइल रणनीतिक सांझ भ्याली च होई दी महत्वपूर्ण प्रगति दी बी समीक्षा करडन। ओहू विज्ञान ते टेकनालजी, नवाचार, रक्षा ते सुरक्षा, राईबाई, जल प्रबंधन, बपार ते अर्थ बवस्था ते दौनें देशें दे लोके-लोके बश्कार संपर्क ते आदान-प्रदान सने बक्ख-बक्ख खेत्तरें च सहयोग बधाने दिएं संभावनाएं पर बी चर्चा करंगन। दौनें नेताएं दे आपसी हितें ते क्षेत्री ते कुल संसारी मुद्दें पर सोच-विचार करने दी बी मेद ऐ।

<><><><><><>

IYC-Prez. Arrest

दिल्ली दी इक अदालत नै भारत मंडपम च इंडिया ए.आई इम्पैक्ट समिट 2026 दरान होए दे बरोध प्रदर्शन दे सिलसिले च भारती युवा कांग्रेस दे अध्यक्ष उदय भानु चिब होरें गी 4 दिनें दी पुलस हिरासत च भेजी दित्ता ऐ। अधिकारियें मताबक चिब हुंदे पर बरोध-प्रदर्शन दा मुख षडयंत्रकारी होने दा आरोप ऐ। दस्सेआ जा'रदा ऐ जे ओहू राष्ट्र बरोधी नारा लाने च शामिल हा। चिब हुंदे कन्नै श्री कृष्णन हरि, कुंदन यादव, नरसिम्हा यादव ते अजय

कुमार यादव होर बी आरोपी ना। दिल्ली पुलस दा आखना ऐ जे चिब होरें पुच्छ-गिच्छ दरान झूटी पर तैनात पुलस अधिकारियें पर हमला कीता। पुलस नै दस्सेआ जे मामले दी जांच चला'रदी ऐ ते अग्रे दी पुच्छ-पड़ताल ते उचित जांच लेई चिब हुंदी हिरासत दी अवधि बदाए जाने दी मंग कीती गई ऐ। अज्ज नमीं दिल्ली च मीडिया गी संबोधित करदे होई बीजेपी प्रवक्ता गौरव भाटिया होरें आरोप लाया जे कांग्रेस नेता राहुल गांधी होर मुख षडयंत्रकर्ता ना। उनें आखेआ जे राहुल गांधी ते कांग्रेस अध्यक्ष मल्लिकार्जुन खडगे होरें गी देशवासियें थमां माफी मंगनी लोडचदी ऐ। भारती युवा कांग्रेस अध्यक्ष दी गिरफ्तारी पर बीजेपी प्रवक्ता शहजाद पुनेवाला होरें आखेआ जे कांग्रेस दे इस कम्मै गी ओहदे अपने नेताएं ते गठबंधन सहयोगियें दा बी समर्थन नेई थहोआ। अज्ज नमीं दिल्ली च मीडिया कन्नै गल्ल करदे होई पूनावाला होरें आरोप लाया जे भारत मंडपम च होई दी घटना इक गैहरी साजिश ही ते राहुल गांधी सने वरिष्ठ कांग्रेस नेता उस साजिश दा हिस्सा हा। कांग्रेस नै अपने युवा विंग प्रमुख ते कार्जकर्ताएं दी गिरफ्तार दी निदेआ कीती।

<><><><><><>

VP-Tourism Summit

उपराश्ट्रपति सी.पी राधाकृष्णन होरें अज्ज नमीं दिल्ली यू.एस इंडिया स्ट्रैटजिक पार्टनरशिप फोरम आसेआ आयोजित टूरिज्म लीडरशिप समिट 2026 दा उद्घाटन कीता। सभागी संबोधित करदे होई श्री राधाकृष्णन होरें आखेआ जे सैलसफा छडा इक उद्योग नेई ऐ बल्कि एहू संस्कृतियें बश्कार इक सेतु ते आर्थिक मौके दा इक प्रमुख चालक ऐ। उनें आखेआ जे सैलसफा साफ्ट डिप्लोमेसी दा इक शक्तिशाली साधन ते भारत-अमरीका आर्थिक गलियारे दा इक प्रमुख थम्म ऐ। उपराश्ट्रपति होरें इस गल्ला पर जोर दित्ता जे यात्री अनुभव, प्रमाणिकता, स्थिरता, संस्कृति, विरासत, सोआस्थ ते सार्थक जुड़ाव दी तपाश करदे ना। राधा कृष्णन होरें आखेआ जे सैलसफा रोजगार पैदा करने आहले सभनें शां बड्डे खेत्तरें चा इक ऐ। उनें सैलसफा खेत्तर दे समावेशी ते टिकाउ विकास गी यकीनी करने लेई कौशल, उद्यमिता ते महिला नेतृत्व आहले उद्यमें च निवेश करने पर जोर भरेआ।

<><><><><><>

Economy Growth

भारती स्टेट बैंक आसेआ अज्ज जारी इक रपोर्ट मुजब चालू माली बरे दी त्री तिमाही च देश दी अर्थ बवस्था च 8 इशारिया 1 प्रतिशत दा बाह्वा दर्ज कीता गेआ ऐ। रिपोर्ट च आखेआ गेआ ऐ जे 31 दिसंबर 2025 गी खत्म होई दी चालू माली बरे दी त्री तिमाही च आर्थिक गतिविधियां निग्गर बनी दियां रेहियां। रपोर्ट च इब्बी दस्सेआ गेआ ऐ जे 31 दिसंबर 2025 गी खत्म होई दी चालू माली बरे दी त्री तिमाही च आर्थिक गतिविधियां निग्गर बनी दियां रेहियां। रपोर्ट च इब्बी आखेआ गेआ ऐ जे कुल संसारी सतह दिएं चनौतिएं दे बावजूद अर्थ बवस्था नै विकास दी रफ्तार मजबूत बनाई रक्खी दी ऐ ते गैर कृषि दौनें खेत्तरें च दिल बधाने आहले रूझाने दे चलदे ग्रामीण इलाके च खरीद ते उपभोग दी स्थिति मजबूत बनी दी ऐ। एहदे नै पता लगदा ऐ कि भारतीय अर्थ बवस्था शैल निग्गर स्थिति च ऐ। एहू रपोर्ट ऐसे समें सामने आई ऐ जिसलै भारत अपने सकल घरेलू उत्पाद यानि जीडीपी आधार बरे गी 2011-12 सवां तरमीम करिये 2022-23 करने जा'रदा ऐ। नमीं जीडीपी श्रृंखला 27 फरवरी 2026 गी जारी होने आहली ऐ।

<><><><><><>

NMP

सरकार दी राश्ट्री मुद्रीकरण पाइपलाइन तैहत परिसंपत्ति मुद्रीकरण पैहल दे अगले 5 थमां 10 बरें च देश दे सकल घरेलू उत्पादन च 40 लक्ख करोड़ रपे दी वृद्धि होने दी मेद ऐ। नीति आयोग दी रिपोर्ट च इस गल्लै पर लोड पाई गई जे परिसंपत्ति मुद्रीकरण मौजूदा सार्वजनिक परिसंपत्तियें थमां मूल्य आंकलन करिये प्राप्त रकम गी नमीं अवसंरचना परियोजनाएं च पुननिर्वोश करिये अवसंरचना निवेश गी बढ्जवा देने ते आर्थिक विकास गी गति देने च महत्वपूर्ण भूमिका निभाग।

<><><><><><>

Maowadi-Surrender

तेलंगाना च अज्ज हैदराबाद च 4 बड्डे माओवादी नेताएं आत्मसमर्पण करी दित्ता। पोलित ब्यूरो दे मिम्बर तिप्पिरी तिरुवपति देवुजी, केद्री समिति दे मिम्बर मल्लाराजी रेड्डी संग्राम, तेलंगाना राज्य समिति सचिव बडे चोक्का राव

दामोदर ते राज्य समिति दे मिम्बर नूने नरसिम्हा रेड्डी गंगन्ना नै पुलस महानिदेशक बी शिवधर रेड्डी हुंदे सामने आत्मसमर्पण करी दित्ता। पुलिस महानिदेशक होरें हैदराबाद च मीडिया गी जानकारी दित्ती कि मुखमंत्रि रेवंत रेड्डी हुंदी मुखधारा च वापस औने दी अपील दे बाद इनें माओवादिणं अपने आपै गी कनून दे हवाले करी दित्ता ऐ।

<><><><><><>

Pak-Khaibar Attack

पाकिस्तान दे खैबर पखतूनख्वा प्रांतै दे कोहाट जिले च अज्ज पुलसै दी इक गड्डी पर लड़ाकें दे इक हमले च 6 पुलस कर्मिणं दे मारे जाने दी खबर ऐ जिसलै कि इक गंभीर तौरा पर घायल दस्सेआ जा'रदा ऐ। कोहाट दे जिला पुलस अफसर नै दस्सेआ ऐ जे शकरदरा रोड पर हमलावरें घात लाइयै पुलसै दी गड्डी गी नशाना बनाया। हमलावरें हमले दे बाद गड्डी गी अगग लाइयै फूकी दित्ता ते फरार होई गए।

<><><><><><>

Manipuri-Film

सूचना ते प्रसारण मंत्री अश्विनी वैशणव होरें वाफटा पुरस्कारें च बाल ते परिवारिक फिल्म श्रेणी च जित्त हासल करने पर मणिपुरी फिल्म बूंग दी पूरी टीम गी मुबारकबाद दित्ती ऐ। सोशल मीडिया पर इक पोस्ट च वैशणव होरें आखेआ के मणिपुरी फिल्म बूंग एह पुरस्कार जित्तने आहली पैहली भारती फिल्म फरहान अख्तर दी कंपनी एक्सल एंटरटेनमेंट नै कीता ते एहदा निर्देशन लक्ष्मीप्रिया देवी नै कीता।

<><><><><><>

ICC-T20 Cricket

आई.सी.सी टी-20 विश्व कप दे ग्रुप दो दे इक सुपर एट मकाबले च एल्लै पाकिस्तान ते इंग्लैंड बश्कार मकाबला शुरू होई चुके दा ऐ। टॉस जित्तियै पाकिस्तान नै पैहले बल्लेबाजी करने दा फैसला लैता ते हुनै कोला किश चिर पैहले 4.5 ओवरें च 2 विकेटें दे नुकसान पर 36 रन बनाई लैते दे हे। मैच श्रीलंका दे पल्ले केले अंतरराष्ट्री क्रिकेट स्टेडियम च खेडेआ जा'रदा ऐ। एहदे शा पैहले कल राती मुम्बई च ग्रुप 1 दे सुपर 8 मकाबले च वेस्ट इंडीज नै जिम्बाब्वे गी 107 रन कन्नै हराई दित्ता। वेस्ट इंडीज दे 255 रन दे लक्ष्ये दे परते च जिम्बाब्वे दी पूरी टीम 18में ओवर तगर 147 रन गै बनाई सकी। पैहले बल्लेबाजी करदे होई वेस्ट इंडीज नै 20एं ओवरें च 6 विकेटें दे नुकसान पर 254 रन बनाए हे।

<><><><><><>

Women Cricket

महिला क्रिकेट च आस्ट्रेलिया दे ब्रिसबेन च मेजबान टीम नै भारत गी पैहले इक रोजा मैच च 6 विकेटें कन्नै हराई दित्ता। 3 मैचें दी श्रृंखला दे पैहले मैच च भारत नै पैहले बल्लेबाजी करदे होई 214 रन बनाए। 215 रन दे लौहके जनेए लक्ष्य गी आस्ट्रेलिया नै सखल्ले हासल करिये श्रृंखला 1-0 दी बढत बनाई लैती ऐ। भारती टीम पूरे 50 ओवर बी नेई खेड्डी सकी ते 48 ओवर ते 3 गेंदें पर गै आउट होई गई। स्मृति मंधाना नै 58, कप्तान हरमनप्रीत नै 53 ते गौतम नै 43 रन बनाए।

<><><><><><>

FSSAI

औंदी ध्यारें दी रुतै कोला पैहले- भारतीय खाद्य सुरक्षा ते मानक प्राधिकरण FSSAI नै सब्भनें राज्यें ते केन्द्र शासत प्रदेशें दे फूड कमीशनरें गी आखेआ ऐ जे ओ बजारें च मती सतर्कता बरतन ते रूट्टी पकाने आहलें ते दुड्ढै नै त्यार उत्पादें जियां घेयो, पनीर, खोआ वगैरा दे म्यार पर नेडमी ते चेचे तौरा पर तक्क रक्खन। FSSAI नै राज्य खुराक आयुक्तें दे नां लिखी दी इक चिट्ठी च आखेया ऐ जे होली ते ईद उत्सव दे सिलसिले च दुध, पनीर, घेयो वगैरा दी मंग बधी जंदी ऐ, जेहदे चलदे मौका परस्त मलावट-खोर इस मौके पर फैयदा ठोआंदे होई तेल ते खाने-पीने दे समेयान च मलावट करियै मता मनाफा खट्टने दे चक्करें च रौहन्दे ना। इस करिय इस चाल्ली दे लोकें खलाफ सख्त कारवाई कीती जा।

<><><><><><>

Jammu Srinagar Vande Bharat

उत्तर रेलवे दा जम्मू डिविजन जम्मू ते श्रीनगर बश्कार वंदे भारत एक्सप्रेस रेल सेवा शुरू करने दी तयारियें दे अखीरले चरण च ऐ। आकाशवाणी जम्मू संवाददाता नै जानकारी दित्ती ऐ जे इस महत्वपूर्ण रस्ते पर सेमी हाई स्पीड ट्रेन शुरू करने बारै बद्धी अटकलें दे चलदे उत्तर रेलवे नै घोशणा कीती ऐ जे जम्मू ते श्रीनगर बश्कार वंदे भारत रेल सेवा पैहली मार्च 2026 थमां शुरू होई जाह्गं जम्मू रेलवे डिविजन दे सीनियर डिविजनल कमर्शियल मैनेजर उचित सिंघल होरें इस गल्लै दी तस्दीक कीती ऐ जे श्रीनगर ते कटडा बश्कार एल्लै चला'रदी वंदे भारत रेल गड्डी 26-402 गी पैहली मार्च थमां जम्मू तगर बधाई दित्ता गोआ ऐ। तोआई, जम्मू रेलवे स्टेशन पर नमें टर्मिनल भवन ते प्लैटफार्म दे विस्तार दा कम्म तेजया कन्नै चला'रदा ऐ। अधिकारियें मेद बुज्झी ऐ जे नमें कारीडोर ते टर्मिनल परियोजना दा कम्म इस बरे दे अंदर-अंदर पूरा होई जाह्ग।

<><><><><><>

SMVDSB-Museum

श्री माता वैश्वो देवी श्राइन बोर्ड नै प्रस्तावित अंतरराष्ट्री देवी संग्रहालय लेई इक समर्पित आनलाइन पोर्टल दी शुरूआत कीती जेडा परियोजना दे वैचारिक विकास च इक महत्वपूर्ण प्रगति दा प्रतीक ऐ। एह पोर्टल श्राइन बोर्ड दे अध्यक्ष ते उपराज्यपाल मनोज सिन्हा हुंदी अध्यक्षता च होई दी 76मीं बोर्ड बैठक च दित्ती गेदी मंजूरी दे बाद लांच कीता गोआ। एह समर्पित पोर्टल <http://double/suggestions.smvdsbimog.org/> दिव्य नारित्व ते पूजनीय शक्ति परम्परा दे आध्यात्मिक, सांस्कृतिक ते ऐतिहासिक आयामें गी समर्पित विश्व स्तरीय संग्रहालय दी स्थापना लेई संरचित सुझाएं ते विद्वतापूर्ण योगदानें गी सुगम बनाने लेई बनाया गोआ ऐ।

<><><><><><>

Weather

भारती मौसम विभाग नै अगले दो दिनें दरान अंडमान निकोबार च अंधी झक्खड, गड्किए बरने ते बिजली कडकने जनेए मौसम दी पेशगोई कीती ऐ। इसै चाल्ली दा मौसम अज्ज ते कल ओडिशा, झारखंड, पच्छिम बंगाल दे गंगा कन्नै लगदे इलाकें च बने रौहने दी तवक्को ऐ। मौसम विभाग नै अरुणाचल प्रदेश, असम, मेघालय, सिक्किम, उप हिमालयी पच्छिम बंगाल, पूर्वी मध्य प्रदेश, विदर्भ, तेलंगाना, छत्तीसगढ़ ते आंध्र प्रदेश दे समुंद्री इलाकें च बी गर्जी चमकिए तूफान आई सकने दे असार दस्से न।

<><><><><><>